









Vertical text on the left edge of the page, likely a page number or title, written in a smaller seal script. The characters are partially obscured and difficult to read, but appear to be '上海圖書館藏' (Collection of Shanghai Library).

歐陽文忠公全集卷一百一十六

外制雜詔四十九首

百一十六

不置劉氏嘉

勸農勅

通商茶法詔

頒旨舉條制勅

堂後官李元方可大理寺丞制

祠部員外郎直集賢院兩浙轉運按察使王琪

可就轉刑部員外郎制

國子博士陳淑祕書丞薛仲簡尹源太子中舍

李隨大理評事朱壽昌磨勘改官制

前光祿寺丞王簡言復舊官制

次之忠公全集卷一百一十六

登州黃縣尉東方辛可密州司士叅軍制

華州鄭縣尉程炎可泗州錄事叅軍京兆府興

平縣尉呂定可鳳翔府左司理叅軍制

大理評事張子庚可大理寺丞制

舒州推官呂選可大理寺丞制

殿中丞郭及大理寺丞魯有立大常寺太祝張

昭度等磨勘改官制

東頭供奉官葉達可內殿崇班制

環州石昌鎮熟戶牛家族巡檢奴訛男萬訛可

本族都軍主制

審官院令史馬登可遂州司戶叅軍充職制

西京左藏庫使內侍省內侍押班任守信可遙

郡刺史依舊鄜延路駐泊兵馬鈐轄制

開封府兵曹叅軍謝曄可大理寺丞制

虞部員外郎盧士宏太常博士王揆祠部員外

郎祕閣校理張環丁憂服闋復舊官制

比部員外郎趙宗古謝衍屯田員外郎李琪祕

書丞劉元瑜殿中丞馬仲磨勘改官制

前磁州錄事叅軍杜欽可衛尉寺丞制

前杭州司理叅軍范袞可衛尉寺丞充堂後官

制

將作監主簿程中行制

祠部郎中沈周可開封府判官制

絳州防禦判官張銳衛州軍事推官汲熙載可

大理寺丞制

供備庫副使王道卿可西京左藏庫副使制

前彰信軍節度判官褚式可太子中舍致仕制

祠部員外郎崔嶧男庶可試祕書省校書郎制

梓潼縣主簿宋文質可國子監丞致仕制

駕部員外郎席夷甫可本官致仕制

南劍州司理叅軍李孝友責授吉州叅軍制

江南路提刑內殿承制柴貽慶可就轉禮賓

副使制

右侍禁樂天錫可率府率致仕制

大理寺丞袁穆許恢授殿中丞著作佐郎程適

授秘書丞制

皇姪仲伉贈官制

秦州推官董彝可太子中舍致仕制

劍州司理參軍董壽可大理寺丞制

兵部郎中皇甫泌男偁可將作監主簿制

東頭供奉官閣門祗候知勝關寨李守信可就

轉內殿崇班儀州寨主制

和州防禦判官夏侯溥可太子中舍致仕制

都官員外郎知成州王嘉聞轉職方員外郎殿

中丞知普州葛昌轉國子博士某官監洛州

鹽酒稅李思恭轉駕部員外郎制

東頭供奉官張德榮張行簡可率府率致仕制

虞部員外郎呂師簡可比部員外郎制

悉利族軍主嗟移可都軍主制

東上閣門使普州刺史趙安期可右領軍衛大

將軍致仕制

供備庫副使沿邊巡檢都監王守一可就轉西

京左藏庫副使制

具州歷亭縣主簿周登可國子監丞致仕制

進納長馬空名誥海詞

潁州推官江楫可大理寺丞制

廣南西路轉運按察使金部員外郎周陵可司

勳員外郎就差充荆湖南路轉運按察使制

勸農勅

勅朕惟德之不明而至於用武久興師旅重困黎元  
有閔民愛物之心誰能副予意者有信賞必罰之令

今將舉而行之朕言有條其聽無忽夫農天下之本也凡爲國者莫不務焉要在節其用則易充勉其力使不匱今夫食者甚衆而輸者已殫勸之不勤而取之仰足使民盡耕猶不給而半爲游惰之手使歲常熟猶恐乏而多糶水旱之凶調歛不得已也而吏之不仁者緣以誅求賦役自有法也而政之不明者重爲煩費農者有幾害者若茲欲寬吾民何可得也旣富而教豈無術乎體予茲懷望爾良吏自今任官有能興水利闢田荒課農乘增戶口凡有利農而弗擾者有司具爲賞格當議旌酬其或陂池不修田野不

關棗不植戶口流亡慢政隳官亦行降黜夫言而  
不信法弛於寬朕久患之方思革弊爾毋循習舊態  
慢我新書此匪虛名必期責實凡爲條約告爾旣明  
賞吾不欺罰爾無悔

頒貢舉條制勅

勅夫儒者通乎天地人之理而兼明古今治亂之原  
可謂博矣然學者不得騁其說而有司務先聲病章  
句以牽拘之則吾豪雋竒偉之士何以奮焉有純明  
朴茂之美而無敦學養成之法其飭身勵節者使與  
不肖之人雜而並進則夫懿德敏行之賢何以見焉

此士人之甚弊而學者自以爲患議者屢以爲言朕  
慎於改更比令詳酌仍詔宰府加之叅定皆以謂本  
學校以教之然後可求其行實先策論則辨理者得  
盡其說簡程式則閑博者可見其材至於經術之家  
稍增新制兼行舊式以勉中人其煩法細文一皆罷  
去明其賞罰俾各勸焉如此則待士之意周取人之  
道廣夫遇人以薄者不可責其厚今朕建學興善以  
尊子大夫之行而更制革弊以盡學者之材予於教  
育之方勤亦至矣有司其務嚴訓道精察舉以稱朕  
意學者其思進德脩業而無失其時凡所科條可爲

求制

通商茶法詔

勅占者山澤之利與民共之故民足於下而君裕於上國家無事刑罰以清自唐末流始有茶禁上下規利乘二百年如聞比來爲患益甚民被誅求之困日惟咨嗟官受濫惡之入歲以陳積私藏盜販犯者寔繁嚴刑重誅情所不忍使田閭不安其業商賈不通于行嗚呼若茲是於江湖之間幅員數千里爲陷窵以害吾民也朕心惻然念此久矣間遣使者徃就問之而皆歡然願弛摧法歲入之課以時上官一二近

臣件析其狀朕嘉覽于再猶若憮然又於歲輸裁減其數使得饒阜以相爲生剗去禁條俾通商賈歷世之弊一旦以除著爲經常弗復更制損上益下以休吾民尚慮喜於立異之人緣而爲姦之黨妄陳奏議以惑官司必寘明刑用戒狂謬布告遐邇邇體朕意焉

堂後官李元方可大理寺丞制

勅李元方丞相府天下政本也吾任於相者旣重則爲之選吏也亦艱賞勞勸能皆有優典以爾給事茲久其勤益著慎不漏泄謹無過差用爾歲成俾丞卿寺勉圖後效無玷寵榮可

祠部員外郎直集賢院兩浙轉運按察使王  
琪可就轉刑部員外郎制

勅具官王琪以儒學兵于朝而嘗好言天下之利今  
二浙之廣生齒衆而物產繁誠可以效汝之材幹予  
之蠱今有司中考績之舊文乃敘遷之常法爾其能  
使吾民不勞而邦用給足去吏之貪愚者毋害于州  
縣舉士之材能者不遺其寒俊厥效苟著信賞豈稽  
徃其勉哉以率爾職可

國子博士陳淑祕書丞薛仲簡尹源太子中  
舍李隨大理評事朱壽昌磨勘改官制

勅國家考課之格敘進有常所以示爲法之均平而防有司之輕重也及其弊也賢愚並進而功過不明屬者命考舊文稍更新制不專累日以爲限間須善舉而後遷夫選之艱則材者出賞之當則能者勸焉此予之意也今汝等雖以滿歲增秩而皆敏材可籍尚有爾知以應新法可

前光祿寺丞王簡言復舊官制

勅夫王者之有赦所以閔訓道不純而愚民之陷焉者開其自新之路誘於改過之善而已然前世議者莫不以數赦爲患得非人之無良以赦爲幸者歟具

官王簡言服于朝倫嚮以罪廢屢經肆眚且與滌瑕夫過不可以貳赦不可以幸惟勉爾力以贖前羞可

登州黃縣尉東方辛可密州司士叅軍制

勅具官東方辛朕以信示天下而以祿報有功今爾辛緣死事而命于官然按察者糺失職而來有請按察吾所詔也不從則不自信念功吾所急也不報則無所勸焉是用易爾散秩優爾俸祿免爾吏責俾爾自安庶幾使吾信賞並行而不失可

華州鄭縣尉程炎可泗州錄事叅軍京兆府興平縣尉呂定可鳳翔府左司理叅軍制

勅自兵興以來盜賊頗衆屢明信賞思以勸能具官  
程炎等各以敏材試于一尉今有司上爾所獲應于  
賞格聊茲甄錄以嘉勤勞夫量功而賞大小異宜勉  
爾自圖余無所愛可

大理評事張子庚可大理寺丞制

勅具官張子庚往臨邑政近在王畿當夫賦役方繁  
而盜賊並起凡諸州縣之吏能不失職而免於咎者  
盖亦鮮焉爾考績有司法當進秩能守厥職是亦可  
嘉遷爾卿丞勉終縣治可

舒州推官呂選可大理寺丞制

勅具官呂選國家設官之法由保薦而遷者必試之  
縣政非惟質舉者之信否亦以慎臨民之選焉以爾  
久服官勤今由材舉往服新命將觀汝能可

殿中丞郭及大理寺丞魯有立大常寺太祝  
張昭度等磨勘改官制

勅具官郭及等朕患考績之不明而使無聞者累久  
而幸遷有善者混淆而莫別故申新法不專以日月  
敘秩而間須保任之舉非以抑人之進而所以求能  
者焉汝等無謂今由積日而得次升尚勤後圖以俟  
知者可

東頭供奉官葉逵可內殿崇班制先因過犯

年今及四  
年除授

勅具官葉逵國家命官之術必量功過之分計歲時  
之勤以為陞黜法在有司其平不欺其信不渝以爾  
嚮因事累擢其會課今日月及矣考績者以時來上  
還汝所當得者示我不汝忘焉可

環州石昌鎮熟戶牛家族巡檢奴訛男萬訛  
可本族都軍主制

勅萬訛世捍邊陲繼生材武能以威信服其部人今  
爾父以疾而告休俾爾承家而濟美夫忠孝之節不

徒守其先業而已亦以奮功名而圖富貴焉可

審官院令史馬登可遂州司戶叅軍充職制  
勅馬登百司丞史皆有入官之格不惟賞其勞所以  
勸能者而謹其無過也惟勤與慎可不勉焉可

西京左藏庫使內侍省內侍押班任守信可  
遙郡刺史依舊鄜延路駐泊兵馬鈐轄制

勅國家自靈夏不賓邊隅多警議者率以謂用兵之  
道任將宜專恩信不久則無以得士心山川不習則  
不可圖勝筭頃自兵宿于野久而無功此殆將帥數  
易之過也苟其能者無遽奪焉以具官任守信選以

一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十  
二十一  
二十二  
二十三  
二十四  
二十五  
二十六  
二十七  
二十八  
二十九  
三十  
三十一  
三十二  
三十三  
三十四  
三十五  
三十六  
三十七  
三十八  
三十九  
四十  
四十一  
四十二  
四十三  
四十四  
四十五  
四十六  
四十七  
四十八  
四十九  
五十  
五十一  
五十二  
五十三  
五十四  
五十五  
五十六  
五十七  
五十八  
五十九  
六十  
六十一  
六十二  
六十三  
六十四  
六十五  
六十六  
六十七  
六十八  
六十九  
七十  
七十一  
七十二  
七十三  
七十四  
七十五  
七十六  
七十七  
七十八  
七十九  
八十  
八十一  
八十二  
八十三  
八十四  
八十五  
八十六  
八十七  
八十八  
八十九  
九十  
九十一  
九十二  
九十三  
九十四  
九十五  
九十六  
九十七  
九十八  
九十九  
一百

敏材臨于戍事肅軍捍寇宣力有聞遽以飛章自言  
滿歲顧久親於矢石豈不念於勤勞然而士卒之樂  
旣汝安夷狄之情惟汝熟雖欲代汝實難其所宜  
旌以郡章仍臨舊部體茲委寄服我茂恩可

開封府兵曹參軍謝曄可大理寺丞制

勅具官謝曄府掾之制凡再歲而無過失者皆得例  
遷蓋以京師大衆之會獄訟尤多能無過焉是亦材  
也今考爾歲月法當進秩夫官能有守卑者尤難事  
之寔繁勤則克濟勉服明訓徃膺寵章可

虞部員外郎盧士宏太常博士王揆祠部員

能出名臣也乃知古雖吏屬亦必選用賢材焉今中  
書丞相之職比古公府曹掾之制吏員已爲簡闕欲  
任其事豈不擇人故詔銓衡俾其慎選具官范杲有  
司來上以爾爲材進爾諸丞徃率乃職士人可慕無  
自怠焉可

將作監主簿程中行制

勅程中行夫庶耻道缺而貪冒成俗風化之薄久矣  
吾思有以勵焉故於致仕之制特示推恩之優厚廩  
給以家居宮子孫而世及今爾父至服勞在官以老  
得謝宜茲懋賞以示寵榮汝尚勗哉無忘濟美可

祠部郎中沈周可開封府判官制

勅具官沈周夫刑獄以禁暴而託獄足以爲奸法令以止亂而舞法反以滋害平民者政而敗政者吏也知政之術繩吏爲先况乎京師號稱繁劇凡治繁者貴乎不勞苟知其方在得於要摘姦急吏此非要歟以爾久列周行屢經任使通於政事俾佐浩穰告汝政弊之多端訓汝治煩之有術善思乃職無或廢官可

絳州防禦判官張銳衛州軍事推官汲熙載  
可大理寺丞制

勅具官張銳等以爾山學筋身試材于吏服勞既久  
薦者屢聞有邇臣之亟稱加所司之考實推恩進秩  
其慎若斯豈不勉哉無回汝守可

供備庫副使王道卿可西京左藏庫副使制  
朕觀春秋之際公侯卿大夫之譜至數十世而不絕  
不徒世其祿爾惟克劭者乃不隕焉近至于唐將相  
之後能以動名自繼其家者亦衆秉筆者記之號稱  
衣冠盛事噫古之大族多良子孫而今獨鮮耶抑惟  
人之勉不勉爾惟汝大臣之子世爲名家豈不勵焉  
無俾自墜有司積日茲乃敘進不次之賞能者得之

汝其勉哉無忽而怠可

前彰信軍節度判官褚式可太子中舍致仕

制

勅具官褚式昨按察者言爾事有迹而爾方以老自  
請吾屈言者不究而進爾以秩全爾之歸吾之欲成  
人之美而不欲成人之惡如此汝其休矣知我之仁  
可

祠部員外郎崔暉男庶可試秘書省校書郎

制

勅崔暉男庶古稱不學者之於事譬矣立而面墻與

其敗政于宮孰若勸教之明而養之有素也屬者故  
敕有司增定蔭補之格必由試藝乃得蒞官夫不惟  
為國造士是乃為臣立家此予詔也汝其勉之可

梓潼縣主簿宋文質可國子監丞致仕制

勅具官宋文質壯也服勞晚而登仕老能知止意亦  
可嘉吾有躋民仁壽之心爾其歸安田里之養可

駕部員外郎席夷甫可本官致仕制

勅具官席夷甫古者七十而得謝所以優其臣也不  
任以事而養之于家所以憂老也朕患廉耻之缺而  
尤嘉止足之人隆長老之恩而欲興孝弟之俗今爾

之請朕所褒焉已詔有司錄爾之子克安眉壽往服  
寵章

南劍州司理叅軍李孝友責授吉州叅軍制  
勅具官李孝友不孝之罪國有常刑民愚無知犯者  
猶鮮况爾被儒服者誦習六經而背本忘親悖理傷  
化雖屢經赦宥法欲貸汝而汝之自視夫亦何顏宜  
屏遠方絕而不齒

江南 路提刑內殿承制柴貽慶可就轉禮  
賓副使制

勅具官柴貽慶傳曰夫刑者一成而不變又曰法者

天下之至平。庶獄之間。其可不慎。故於國制。尤重邦  
刑。擇彼監司。必叅文武。所以藉其材敏。而佐夫不逮  
者也。惟爾克守其職。能濟以勤。有司質成法。應敘進  
故。增榮秩。無替前勞。可。

右侍禁樂天錫可率府率致仕制

勅具官樂天錫。服勞茲久。因疾得衰。雖未及於引年。  
嘉自能於知止。俾進春宮之率。以爲歸老之榮。可。

大理寺丞袁穆許恢授殿中丞著作佐郎程

適授秘書丞制

並磨勘  
改官

勅具官程適等。國家治民之要。其具素備。惟奉法守

職而免於有過者考其積日皆得敘遷苟有能稱豈  
無懋賞爾等寄予民政咸上歲成俾登于朝盖用常  
異若夫異績在爾勉焉可

皇姪仲伉贈官制

勅具官仲伉朕上憑宗社之靈克荷先帝之業思治  
天下以孝而親九族以仁今宗正言爾信安郡王之  
長孫也不幸早世而追榮之典尚未有稱朕聞于聽  
意甚悼焉可

秦州推官董彞可太子中舍致仕制

勅具官董彞朕嚮遣韓琦行視邊鄙所以宣上恩而

下逮撫下情而上通也今琦言爾有勤未錄久疾自  
淹夫人之有勞吾豈不念事或在遠患於不聞既披  
奏章宜示寵典可

劄州司理參軍董壽可大理寺丞制

勅具官董壽夫法者所以禁民爲非而使其遷善遠  
罪也然世之專於法者不患於不通而患於刻薄豈  
學者之弊歟今爾以學法入官而有能被薦以之臨  
事可不戒哉往服明恩宜慎汝習可

兵部郎中皇甫泌男僉可將作監主簿制

勅具官皇甫泌男僉梓潼去京三千里外而東蜀二

都會也吾難其選知泌爲材而乃以家爲言請任其  
子得榮初仕仍便其私庶乎泌無內顧之憂而得盡  
心於事則汝之幹蠶可不勉哉可

東頭供奉官閣門祇候知勝關寨李守信可  
就轉內殿崇班儀州寨主制

勅具官李守信西師之出累年而將帥之効未著凡  
爲吾扞城而乘障者不亦久勞乎迹其勤誠宜有陞  
進若夫異賞俟爾立功

和州防禦判官夏侯溥可太子中舍致仕制  
勅具官夏侯溥古者王道之隆也使夫種樹畜養皆

不身然爰長帛食而老者得以安之今夫致  
仕而踴者必增其榮秩又廩合于家也  
田野之間養老之具未備而有以優其夫  
往哉服我新命可

都官員外郎知成州王嘉聞轉職方員外郎

殿中丞知普州葛昌轉國子博士某官監洛

州鹽酒稅李思恭轉駕部員外郎制並磨勘改官

勅具官王嘉聞等夫士之學古于祿而陳力涖官者  
孰不欲自為材耶患乎勸勵之無方而使賢能之不  
勉也此朕所以思革審官之法近增舉類之科爾等

猶用舊文例當升秩其思率職無懈厥勤俟乎有聞以應新格可

東頭供奉官張德榮張行簡可率府率致仕制

勅具官張行簡等陳力有年服勞匪怠止足之戒乃能自知終始之恩亦以示勸衛率之長東要官享茲榮名可以休老可

虞部員外郎呂師簡可比部員外郎制

為招軍

具官呂師簡國家嚮因募兵特立賞格俾勸勤者於集事而議者皆患應募之卒雖多而難用豈夫

賞罰賞乎存信今有司... 爾當遷往服新恩其  
恩實効可

悉利族軍主嗟移可都軍主制

勅嗟移夫賊壘未平王師在野當吾聞鼓鼙思將帥  
之際是汝立功名取富貴之時而能率其部人力捍  
狂寇材武忠勇是皆可嘉爵秩階勲茲以爲寵猶有  
異賞爾其圖之可

東上閣門使普州刺史趙安期可右領軍衛  
大將軍致仕制

勅具官趙安期夫陳力就列不能者止而致仕之制  
非爲止者而設乃古所以禮其卿大夫之美名也而  
今又有增官秩頒廩之數於爾之止豈不爲優爾其  
歸哉可以榮矣可

供備庫副使沿邊巡檢都監王守一可就轉

西京左藏庫副使制

勅具官王守一臨于軍政邈彼塞垣訓齊甲兵謹備  
寇盜爾其勤職吾不忘勞適因奏課之來宜舉陟明  
之典可

具州歷亭縣主簿同登國子監丞致仕制

勅具官周登方剛而仕以疾思歸自陳不能可謂楚  
止有官以爲汝寵有俸以終汝身體予深仁膺此嘉  
命可

進納長馬空名誥海詞

勅某人等國家以用師西鄙不欲加賦於人乃能出  
爾家貲佐吾邦用第其多少咸有旌酬俾綴官聯以  
榮里閭可

潁州推官江楫可大理寺丞制

勅具官江楫朕思與多士共寧庶邦而賢豪材美之  
人或自沉於幽遠與夫懿節茂行之韞干中而未見

於事者吾皆不得而徧觀焉故以舉類之科而爲官  
人之法今舉者言爾材行可稱命爾新恩以期後効  
可

廣南西路轉運按察使金部員外郎周陵可  
司勳員外郎就差充荆湖南路轉運按察使  
制

勅具官周陵朕顧荆楚之俗雜於諸蠻而嚮者州縣  
之間不能綏輯與民生患曠日未平夫惟蠻夷雖不  
通於禮義而剽輕之性惟信可懷獷悍之心以威則  
服思擇能者僉曰汝材至於察官吏之否臧平其

而移用廣西之最朕已嘉焉今其諭我至仁曉茲異  
俗並伸威信以靜一方仍遷郎署之榮以增使車之  
重可



歐陽文忠公全集卷一百二十六

不圖天公之筆也

三



次陽人記公以集卷一百二十七

歐陽文忠公全集卷一百二十七

外制五十首

內殿承制葉達可左監門衛將軍致仕制

駕部員外郎致仕席夷甫男汝賢可將作監主

簿制

內殿崇班柴貽坦可內殿承制制

福州寧德縣令孫知古可太子中舍致仕制

前太常寺奉禮郎司馬且前將作監主簿司馬

光前祕書省校書郎黃元規丁憂服闋復舊

官制

比部員外郎知眉州馮平轉虞部員外郎太常

博士知秀州嘉興縣胡昉轉秘書丞制

東頭供奉官鍾懷德可內殿崇班制

東頭供奉官夏惟慶可內殿崇班制

進納人空名詔海詞

三班借職崔瑾可換縣尉制

太子中允通判秦州馮誥可太常丞制

文學李長卿可長史制

著作佐郎張去惑可秘書丞制

任若拙牛文澤等改官制

殿中丞通判延州高良夫可國子博士制

前司門員外郎樂許國殿中丞路綸李仲宣丁

憂服闋復舊官制

內殿崇班劉顯可內殿承制制

澤州推官李泰可大理寺丞制

大理寺丞知鉅野縣孟皆可太子中舍制

陳曙李方改官制

駙馬都尉柴宗慶可贈中書令制

前觀察支使試大理司直張德熙懷州防禦判

官試大理司直倪俊並可檢校水部員外郎

制

永興軍節度推官董士庶可著作佐郎制

潭州錄事參軍楊令聞可太子中舍致仕制

權保安軍判官王溫恭可知延州延水縣制

平陽郡王允升第二十二女趙氏可某縣主制

入內內侍省內東頭供奉官李允恭可內殿承

制制

真州推官陳則可大理寺丞制

內殿崇班郝質可內殿承制制

龍衛指揮使邢贊拱聖指揮使胡元並可內殿

承制制

殿中丞往愈可國子博士制

錄事參軍張垂象登州文登縣令孟巨源並可

太子中舍致仕制

右侍禁田延昭可右內率府率制

三司前行胡敷可許州長史制

前將作監主簿張盛丁憂服闋復舊官制

大理寺丞王諄轉左贊善大夫贊善大夫王若

谷轉殿中丞著作佐郎李望周輔並轉秘書

丞制

前漣水軍判官吳知幾可大理寺丞制

供備庫副使郭承緒可西京左藏庫副使制

秦州觀察支使喬察可靜難軍節度推官知隴

城縣制

吳守一改官制

沂州沂水縣主簿韓道可大理評事制

比部員外郎致仕張緯男允修可將作監主簿

制

杜惟序可西上閣門使福州刺史知涇州制

左藏庫使涇原鈐轄王從政可西上閣門使益

州鈐轄制

大理寺丞王陶轉殿中丞大理寺丞郭佑賢王  
正已並轉太子中舍制

試助教郭固可寧州軍事推官制

東頭供奉官李禹言可內殿崇班制

禮院副禮直官王朮可益州司戶參軍充職制  
太常寺太祝張觀可大理評事制

故國子博士李克明可贈度支員外郎制

內殿承制乘達可左監門衛將軍致仕制

勅具官乘達夫少也用其力老也優其秩在予推恩

之意固亦仁矣於汝克終之善豈不美哉况爾方寘  
朝行又升環列歸安汝壽服此新命可

駕部員外郎致仕席夷甫男汝賢可將作監

主簿制

勅具官席夷甫男汝賢夫力彊而仕老至則休還其  
官政于君傳其家事於子士之美行不亦榮哉在爾  
承之宜勤以孝惟善事父乃能事君可

內殿崇班柴貽坦可內殿承制制

勅具官柴貽坦自朝班克勤官次用有司之常典

因滿歲以... 恩益思後效可

福州寧德縣令孫知古可太子中舍致仕制  
勅具官孫知古禮以老者尚不責其筋力而况涖官  
行法非疆而歟者莫能焉士之老而還政者不惟示  
國之優恩亦自愛其身者得以遂其安養也矧加寵  
命豈不榮哉可

前太常寺奉禮郎司馬旦前將作監主簿司  
馬光前祕書省校書郎黃元規丁憂服闋復  
舊官制

勅司馬旦等先王制禮之中不使賢者過而愚者不  
及故三年之喪謂之通制者人皆所共行焉惟立身

事君用顯親揚名之節則必賢者勉焉而可至此孝之大者也爾其思之可

比部員外郎知眉州馮平轉虞部員外郎太

常博士知秀州嘉興縣胡昉轉祕書丞制

勘改官

勅具官馮平等朕頃因考績之文增以薦材之法夫累日月以敘進則患賢愚之不分因舉類而觀能則慮奔趨以求譽知人選士其難若此惟材茂業廣久而自彰者不亦優哉爾宜不懈其勤以求諸已

東

供奉官

可內殿崇

勅具官鍾懷德臨于莞惟類報勤勞因茲會舉之來

勅具官鍾懷德臨于筦推頗服勤勞因茲會課之來  
宜舉敘遷之例升之朝序勉荷寵章可

東頭供奉官夏惟慶可內殿崇班制

勅具官夏惟慶爵祿王者所以厲世磨鈍之具非徒  
爲進者積日之資也爾考績有司例當遷秩升于朝  
序可謂寵榮惟材與能在爾自力可

進納人空名誥海詞

勅某人等官者所以治人而非以假人之器也朕閱  
西人之勞而欲紓其乏有出其私以佐吾之用者是  
亦有益於吾民俾命于官所以示勸爾其往矣服我

茂恩可

三班借職崔瑾可換縣尉制

勅具官崔瑾夫器人之材術者無施不宜其次用其所長而各盡其善今爾猷夫武吏之不足爲而思自擇以奮厥效從爾之請必有可觀可

太子中允通判秦州馮誥可太常丞制

勅具官馮誥西鄙用師久矣而未見成功然凡從事於兵間者微勞小善未嘗不錄而稍爲久次已曰滯材夫材者必能集吾事實者所以圖厥功吾無愛焉以載汝效可

文學李長卿可長史制

勅具官李長卿文學長史皆無職事而有秩俸吾設  
以待天下之士而官其才者其不中於有司者猶祿  
其終身吾於養士之仁至矣汝其知之可

著作佐郎張去惑可祕書丞制

勅具官張去惑國家設官之法患乎巧僞干譽考之  
難止故考績之格三載而一例遷所以使沉實守正  
之人得以自進及其弊也庸人希累日之賞而賢者  
不能自別故又增舊法稍欲因舉類而求能者焉惟  
爾之材世所稱美夫累日而遷非爾志干譽而進不

一區之公...  
一十  
可爲惟思厥中務廣其業可

任若拙牛文渥等改官制

初具官任若拙等朕閱夫士有少而執經老不及祿者其勤可嘉不可以棄故皆登于仕以榮厥躬歲月久焉又增以秩吾之不忘子爾也厚矣往其勉哉可

殿中丞通判延州高良夫可國子博士制

勅具官高良夫邊鄙之事不徒衽金革而當矢石至於撫民人平政賦兄關決於兵間者不亦勞乎惟爾之材久於其事今三載考績而例進秩乃爲常典况爾有勞宜推茂恩以旌能吏可

前日員外郎樂許國

丁憂服闋復舊官制

勅樂許國等夫生事而死祭苴麻哭泣之禮二十七  
月而後止孝子之服於其親也足矣奉其遺體立身  
揚名而施于有政孝子之忠於事君也吾欲觀爾之  
能焉勉膺新恩無怠其志可

內殿崇班劉顯可內殿承制制

勅具官劉顯以爾習知河事二十餘年既久而勤有  
勞可錄宜增榮秩以示褒嘉無易其官俾終厥效可

澤州推官李泰可大理寺承制

勅具官李泰誦習之學患乎專固少通而難施於事  
爾由學禮以登仕而涖官行法能使薦者稱之爲材  
是亦可嘉宜推寵命可

大理寺丞知鉅野縣孟皆可太子中舍制

勅具官孟皆夫執經之士不徒誦其文而必知其義  
一縣之政有土與民用爾所通之經求其治人之術  
苟有善問豈無裨榮勉服新恩以率爾職可

陳曙李方改官制

勅具官陳曙等朕嚮以州縣之間備盜不謹而官吏  
無松擒捕失時雖寘于刑以警不職而思得材武之

士旌其功伐以廣勸能爾於茲時以捷來上霽然推  
賞朕所樂焉服我新恩益勤後效可

駙馬都尉柴宗慶可贈中書令制

勅具官柴宗慶夫爵祿王者所以賞功懋德之器古  
之聰明材智之士處乎崇高猶或顛覆爾以名臣之  
家爲國近戚惟富與貴享茲兼美乃能守而不失克  
保厥終蓋朕思庸孝愛之心務推仁恩之厚而致也  
夫生而寵之以位則歿也不可不榮其終在乎朕心  
旣所嗟閔考之國典則有彛章魂而有知膺此休命  
可

前觀察支使試大理司直張德熙懷州防禦  
判官試大理司直倪俊並可檢校水部員外

郎制

勅具官張德熙等士之在乎下位其有所稱道者吾  
無不擢其材而用之其積日累久而未聞於予者猶  
有無試檢校階勲之次而敘升之所以念勞也况郊  
祀之禮慶賜所均宜有茂恩以彰寵典可

未興軍節度推官董士庶可著作佐郎制

勅具官董士庶自古竒偉之士因時立功而名在竹  
帛者率皆不以細文常行責其備蓋於其大者人有

所不能而能者焉惟爾少而好奇不徇小節喜從兵  
事思奮其材今積久錄勞益從請者若夫異賞待爾  
有焉可

潭州錄事參軍楊令聞可太子中舍致仕制  
勅具官楊令聞嚮因疾病自請退休少有間焉復思  
從政今其決矣可以止哉俾升朝序之榮以爲歸老  
之美可

權保安軍判官王溫恭可知延州延水縣制  
勅具官王溫恭自西鄙用兵而智謀材敏之士奮然  
而爭出者非唯吾爵賞是利益士之負其能者亦欲

因時而有立焉百里之縣有良與土課田而實軍備  
平政以懷邊人亦足有為將觀汝效可

平陽郡王允升第二十二女趙氏可某縣主

制

勅王者之以孝治天下也必先仁其九族然後刑于  
四海故具官允升女趙氏幼而淑美將及有行沐邑  
之封蓋稽舊典其勤女訓徃宜汝家可

入內侍省內東頭供奉官李允恭可內殿

承制制

勅具官李允恭昨者亡命之卒攻劫京西而吏不能

捕煩吾出兵爾稱我使令克奮厥效錄勞第賞宜有  
及焉升爾于朝往膺寵命可

真州推官陳則可大理寺丞制

勅具官陳則朕撫有萬邦以官多士而材能廉善之  
迹苟有聞于予聽者必皆進而用之而申以賞罰之  
文懼乎言者之不信今爾之善屢有以聞勉爾之勤  
克廣其業無使言者干予之罰可

內殿崇班郝質可內殿承制制

勅具官郝質夫被甲馳馬出而與敵周旋于原野搴  
旗斬馘歸而與士卒數俘獲于軍中量功較計蒙褒

被寵進而受賞于朝廷此將帥之事也豈不榮哉戰  
之功有大小國之賞有重輕膺此茂恩更期後效可  
龍衛指揮使邢贊拱聖指揮使胡元並可內

殿承制制

勅具官邢贊等朕之勁兵銳將戍于邊者不可勝數  
惟爾能以武勇出乎其間方吾思得猛士之時吾之  
大臣以爾來上高爵厚祿爲爾等而設也徃其勉矣  
吾將觀汝之能可

殿中丞崔愈可國子博士制

勅具官崔愈博士古經師之職也爾由明經登仕而

居是官於爾之志豈不榮哉夫經者聖人之遺法也  
其臨民涖政始身之道備矣雖未能施之於國子其  
率而行于厥躬可

錄事叅軍張垂象登州文登縣令孟巨源並  
可太子中舍致仕制

勅具官張垂象等致仕士克終之美節也故吏部之  
格吏昧無重輕皆不得與乎斯命所以勸廉士而重  
乎歸老之榮也爾等爲吏二十餘年而能獲還政之  
名以歸宜推褒恩以寵田里可

右侍禁田延昭可右內率府率制

勅具官田延昭爾之子况乃吾侍從之臣既不得去  
吾而從汝而念汝之老思得來歸朕亦嘉汝世陷虜  
中能識忠義自拔歸國致子顯榮宜有嘉褒以旌美  
節服茲休命慰子孝心可

二司前行胡敷可許州長史制

勅胡敷陳力涖事積有歲年自知不能以疾而止俾  
列州佐以榮厥終可

前將作監主簿張盛丁憂服闋復舊官制

勅張盛爾幼未任事而已命于官蓋承其祖父之遺  
業長而宜思有立以顯其親惟學可以成人爾其勉

而無怠可

大理寺丞王諄轉左贊善大夫贊善大夫王  
若谷轉殿中丞著作佐郎李望周輔並轉祕

書丞制

並磨勘  
改官

勅具官王若谷等庶官之在位者吾不能徧察其常  
行而有司考第歲月以爲進退之法惟治之有轂者  
吾未嘗遺必有甄擢子聞無壅各勉所爲可

前漣水軍判官吳知幾可大理寺丞制

勅具官吳知幾士之飭躬勵行以勤厥官未有不知  
於人者知而薦之吾亦無所遺焉惟爾之能數有稱

道有司較最於格當升勉膺新恩無廢其業可

供備庫副使郭承緒可西京左藏庫副使制

勅具官郭承緒夫善訓卒者少而愈精善用兵者寡  
可擊衆一障之守苟得其人推恩信以悅士心明教  
習以脩武備扞城禦寇其任豈輕顧爾宣勞頗勤歲  
月今茲考績宜有寵章爾其勉哉思奮厥效可

秦州觀察支使喬察可靜難軍節度推官知

隴城縣制

勅具官喬察夫吏之不能稱職者或謂數易使之然  
今爾宰佐於州就臨屬縣其上下政令之便否士風

民俗之所安皆所習知可以爲治將觀汝績無替其勤可

吳守一改官制

勅具官吳守一夫文士之職有常守而循敘進之科至夫出類之材尚有不次之用况夫武吏有可以奮節立功之資而當茲用武之時其材易施其效易著歲月考課是爲常格膺茲新命其徃勉哉可

沂州沂水縣主簿韓道可大理評事制

勅具官韓道自京以東北苦多盜而臨沂狂卒一歲再變汝以主簿領尉職而能力捕首惡上功第二凡

真捕賊吏後時而無所獲與夫不獲而坐黜罰者豈  
不媿於汝哉夫事無不能惟不勉爾以褒以勸宜有  
寵恩可

比部員外郎致仕張緯男允修可將作監主  
簿制

勅具官張緯男允修凡人之旣老且病而見其子之  
得祿豈不榮哉爾宜修身勵節入而思有以慰其親  
出而思有以報於國可

杜惟序可西上閣門使福州刺史知涇州制  
勅具官杜惟序西鄙用兵五六歲矣思是中外文武

之吏其材勇而可任者無不簡在予心苟思得人則  
擇而用惟爾久習戎事勤於北邊素有能稱熟于朕  
聽涇原重地當賊之衝督視兵師兼撫其俗惟爾爲  
可往其勉哉佩茲新恩以觀厥效可

左藏庫使涇原鈐轄王從政可西上閣門使

益州鈐轄制

勅具官王從政西蜀之人性本輕悍易搖以事動輒  
驚搔而禦寇扞城兵任尤重夫馭兵之法威主於肅  
令一則威明忌患乎私信著則恩浹使士卒和而武  
備謹則軍有善政良無姦心此惟材者能之而爾久

習兵戎嘗委邊寄克堪茲任往服訓詞可

大理寺丞王陶轉殿中丞大理寺丞郭佑賢

王正已並轉太子中舍制

並磨勘  
改官

勅具官王陶等州縣之政其文具矣吏之良者能舉而行之足以爲治故夫奉法守職積勞歲月而無過者皆有進秩之資所以褒勸而勉夫不及也今爾之課考於有司膺茲敘升慎守厥位可

試助教郭固可寧州軍事推官制

勅具官郭固自邊陲用兵而天下游談之士趨時蹈利者吾非不知其濫而未始怠焉者冀必有得於其

間惟爾之能乃其素學大學有實者詰之不窮而推之可用嘉汝施設精而有條慮變適宜將觀汝用可

東頭供奉官李禹言可內殿崇班制

勅具官李禹言惟爾陳力效職三十餘年而後登于朝序雖命官進秩厥有常法而爾之積勞至此不亦勤乎夫得之惟艱守之不可不慎往膺明訓服此寵章可

禮院副禮直官王求可益州司戶參軍充職

制

勅王求太常所上禮皆祖宗之法朝廷之儀掌在有

司爾所當習成書第賞及下不遺徃膺新恩慎守而  
職可

太常寺太祝張觀可大理評事制

勅具官張觀有司上爾會課之書考其日時當得敘  
進夫有勞必錄其信不渝惟勤與能不可不勉可

故國子博士李克明可贈度支員外郎制

勅國家務以孝治爲人子者欲有所申於其父母則  
其爲請不可不從故具官某有子德隆克嗣其世効  
官陳力當得敘遷而思以其榮報於罔極合於經之  
以顯父母之義朕甚嘉之魂而有知膺此追命可

歐陽文忠全集卷一百二十七



歐陽文忠全集卷一百二十七

廿

欽定四庫全書



上海圖書館藏

歐陽文忠公全集卷一百二十八

外制五十首

左班殿直李德隆母王氏可追封永安縣君制

比部員外郎知綿州薛貽應轉駕部員外郎虞

部員外郎知博州薛綸轉司門員外郎祕書

丞知嘉州洪雅縣李述轉太常博士制

司門員外郎李公謹祕書丞充集賢校理楊儀

殿中丞段高磨勘改官制

范仲温可台州黃巖縣尉制

東頭供奉官閣門祗候石宗尹可內殿崇班制

著作佐郎盧革潘洙等磨勘改官制

史館書直官潘宗益可梓州司戶參軍制

角斯波男合羅角可本族軍王制

軍事推官龔待問可桂州觀察推官制

進士劉純可試將作監主簿制

祕書丞竇隨可本官致仕制

邢州觀察支使張德熙可著作佐郎制

大理寺丞薛仲孺可太子右贊善大夫制

殿中丞王正民大理寺丞朱景陽陳僊等磨勘

改官制

內殿崇班李允恭可內殿承制制

節度推官張紳可大理寺丞制

學士院孔目官遂州司戶參軍李懷德可特授

州陽信縣尉充學士院錄事制

虞部員外郎李備太子中舍侯克明大理寺丞

曹琰等磨勘改官制

彰武軍節度推官李仲昌可大理寺丞簽署渭

州判官公事制

故尚父汾陽王郭子儀孫元亨可求興軍助教

制

奉禮郎李景圭可大理評事制

故右驍衛大將軍致仕王元祐男知信可內殿

崇班制

前楚州團練判官丁宗臣可著作佐郎制

左侍禁李從式孫清並可太子左清道率府副

率致仕制

權無爲軍判官劉普洪州錄事參軍張德元並

可太子中舍致仕制

國子監直講青州千乘縣主簿孫復可大理評

事制

太子中舍孫礪可殿中丞制

祕書丞黃正殿中丞盧咸並可太常博士制

原州彭陽縣令郝嗣宗可某州推官制

供備庫副使張禮一可西京左藏庫副使制

杜諮轉官制

柴宗慶第三女可封郡君制

洛苑使英州團練使內侍省內侍右班副都知

藍元用可眉州防禦使罷副都知制

西路供奉官閣門祗候綦恩可內殿承制制

達州司戶參軍吳冲可奉寧軍節度推官制

內殿崇班程逸可左監門衛將軍致仕制

懷州防禦判官倪俊可著作佐郎制

大理寺丞宋緬孫周蘇逢等磨勘改官制

盧守勤致仕制

曹元賓轉官制

司理參軍杜彭壽可大理寺丞制

戶曹參軍尹植可某官致仕制

開封府開封縣主簿孫量可保大軍節度掌書

記制

內殿崇班韓守允可左監門衛將軍致仕制

泰州興化縣主簿朱思道可衛尉寺丞制

溪洞楊先贊可權知古城州制

京西轉運按察使虞部員外郎杜杞可刑部員

外郎直集賢院充廣西轉運使制

內殿承制孟均可千牛衛將軍制

殿中丞史吉亨王珣瑜著作佐郎蘇黃中等磨

勘改官制

蘄州廣濟縣令充國子監直講邵必可大理寺

丞制

外制拾遺十五首

孫復可祕書省校書郎國子監直講制

周陵荆湖轉運使制

皇弟安靜軍節度使允迪可責授右監門衛大

將軍制

楊畋屯田員外郎直史館制

司勳郎中張從革可衛尉少卿制

殿中丞府司錄李虞卿可國子博士制

大明府推官徐治可著作佐郎制

平陽縣尉林術可試祕校知永州祁陽縣事制

大理寺丞彭通程濬可殿中丞某人可贊善制

奏舉人杭州觀察推官呂邁可大理事丞制

軍事推官王野民可大理寺丞制

錄事參軍張師民可大理寺丞制

閩文寶供備副使監亳州茶鹽稅制

滕公輔衛州推官制

藍田縣主簿權充府學教授 可華州蒲城

主簿就差管勾永興府學制

左班殿直李德隆母王氏可追封永安縣君

制

勅夫觀其子之孝可以知其父母之賢具官李德隆

亡母永安縣君王氏生此孝子能守其家請以身官  
移於泉壤夫祿養於親有時而止榮名之及存不朽  
焉魂兮享之可以為慰可

比部員外郎知綿州薛貽應轉駕部員外郎

虞部員外郎知博州薛綸轉司門員外郎祕

書丞知嘉州洪雅縣李述轉太常博士制磨

勤改

勅具官薛貽應等吏之庸庸而無聞者吾所不取章  
章而特見者必擢用之若夫奉法循職守其官而無  
過者不亦吏之良哉念其勤勞豈可不錄三年考績

欽進有常往服新恩無渝爾守可

司門員外郎李公謹祕書丞充集賢校理楊  
儀殿中丞段高磨勘改官制

勅具官李公謹等夫令在必信法在必行今審官考  
課增以舉類之科乃吾示信之令而新行之法也汝  
等敘進於此猶用常文其後當遷皆須應格勉勤其  
業以俟爾知可

范仲温可台州黃巖縣尉制

勅具官范仲温爾弟仲淹參吾大政方欲輔朕平賞  
罰推至公以脩紀綱而正庶位爾今所任有土與民

惟過與功則有賞罰爾勤厥職可不戒哉可

東頭供奉官閣門祗候石宗尹可內殿崇班

制

勅具官石宗尹陳力效官積有歲月會其課最來上  
有司按於舊文當得敘進升之朝列可謂寵榮往服  
新章益勤後效可

著作佐郎盧革潘泳等磨勘改官制

勅具官盧革等州縣之職治有常法而遠方之俗風  
土異宜若夫上克奉於教條下不違於民欲惟勤與  
敏乃克濟焉爾等服職有勞會課來上膺茲敘進無

廢官箴可

史館書直官潘宗益可梓州司戶參軍制

勅具官潘宗益給事有年其勞可錄宜命以秩俾旌厥勤凡爲有司惟久則習尚安乃職以慎克終可

角斯波男合羅角可本族軍主制

勅合羅角生稟勁勇之姿而濟以忠果之性屢陳厥効咸可旌褒俾升官榮以勸諸部勉圖功業無自失時可

軍事推官龔待問可桂州觀察推官制

勅具官龔待問捕盜之格有功者賞而吏能應書者

少非吾有所愛焉苟有其勞豈不甄錄今有司言爾於格當遷方茲多盜之時用勸不能之吏可

進士劉純可試將作監主簿制

勅劉純自兵興累年而功效未立然游談之士以兵爲說而得祿者多矣吾猶意乎厥路尚狹而未足以來特起之人故甄收未始少懈况爾屢經器使而言者謂材宜有推恩以勸來者可

祕書丞竇隨可本官致仕制

勅具官竇隨夫老而致其政於君者士之懿節也爾壯而登仕困於數竒今其老焉可以歸矣安而眉壽

膺此美名可

邢州觀察支使張德熙可著作佐郎制

勅具官張德熙士之在下位而能以聞于上者不有言者乎一失其言則有常罰焉知人而薦豈爲易哉今爾由舉者而被升擢尚勤其業無累爾知可

大理寺丞薛仲孺可太子右贊善大夫制

勅具官薛仲孺爾之伯父奎爲吾大臣參議國政剛直之節見於臨事歿而無嗣吾甚哀之爾幼以奎蔭而登仕籍今由累歲遂升于朝惟爾伯父之行有司考法易以一德不懈執心決斷之名可謂美矣守爾

家法克勤厥官可

殿中丞王正良大理寺丞朱景陽陳侁等磨

勘改官制

勅具官王正良等審官之法三歲一遷惟無過焉乃  
得會課爾等服於官政以涖吾民奉法守職積勞歲  
月膺茲敘進此乃常科勉爾之爲以期懋賞可

內殿崇班李允恭可內殿承制制

勅具官李允恭朕患州縣之吏不職者不能禦姦禁  
暴而憫吾民罹於賊盜故於捕盜之吏推賞尤厚非  
以爲私盖有爲也今爾之請自陳其勞方吾以賞行

勸之時惟恐不及故加爾寵非徇爾私夫古有讓功  
不言之賢惟爾宜慕可

節度推官張紳可大理寺丞制

勅具官張紳朕聞夫兵興而費廣不忍加斂於吾民  
凡能佐國足用者皆思懋賞以勸其勤今薦爾者皆  
曰爾材而吾近臣尤所取信故增汝秩不易厥官夫  
官惟業勤常患不久爾其自勉無替乃勞可

學士院孔目官遂州司戶參軍李懷德可特  
授州陽信縣尉充學士院錄事制

勅具官李懷德夫有司之事惟久則習次遷之例顧

汝宜升無忘克勤慢則有罰可

虞部員外郎李備太子中舍侯克明大理寺丞曹琰等磨勘改官制

勅具官李備等國家外建庶位以官群士而賞罰進退之法掌於有司者所以待中材之無過者爾高能異效吾有不次之用焉爾等咸服于官久勤歲月以勞序進雖曰寵榮勉爾所爲以期懋賞可

彰武軍節度推官李仲昌可大理寺丞簽署渭州判官公事制

勅具官李仲昌群材之在下者思達其上難矣而在

上者思得可用之材豈爲易哉朕頃自擇能臣使舉其類而洙以爾充薦今琦又以爲言琦洙皆能體吾勞於擇士之心者舉爾不應不慎霈然推寵吾所不疑爾尚勉哉以稱茲舉可

故尚父汾陽王郭子儀孫元亨可求興軍助  
教制

勅郭元亨繼絕世褒有功非惟推恩以及遠所以勸天下之爲臣者焉况爾先王名載舊史勲德之厚宜其流澤於無窮而其後裔不可以廢往服新命以榮厥家可

奉禮郎李景圭可大理評事制

勅具官李景圭九州四海風俗不同而王者之化無不及吾於遠者尤加意焉夫吏非敏於其事則不能通俗習而順其宜政一失焉下則重困邈茲南海爾涖吾民今會課上聞增爾榮秩克勤厥職以副予懷可

故右驍衛大將軍致仕王元祐男知信可內  
殿崇班制

勅具官王知信爾父元祐陳力事予告老以休位終環尹歿而餘慶尚及爾身爾嗣厥家苟能有立則始

新晉榮視汝父焉惟孝與忠勉思兩德  
前楚州團練判官丁宗臣可著作佐郎  
勅具官丁宗臣庶官之在位者衆矣吾思一善之取  
而無失則惟舉類之法所得宜多今薦者文章言爾  
可取爾其自勉以稱吾思善之心焉可

左侍禁李從式孫清並可太子左清道率府  
副率致仕制

勅具官孫清等壯而陳力老也告休古人所難有始  
有卒爾能至此可謂克終尚有推恩以嘉爾節歸安  
眉壽服此新榮可

權無爲軍判官劉皆洪州錄事參軍張德元  
並可太子中舍致仕制

勅具官劉皆等禮與法之爲書其於老者皆有優焉  
今爾等學於禮法而能安其老思以歸休吾所嘉褒  
宜推寵命可

國子監直講青州千乘縣主簿孫復可大理  
評事制

勅具官孫復昔聖人之作春秋也患乎空文之不足  
信故著之於行事以爲萬世之法然學而執其經者  
豈可徒誦其言哉惟爾復行足以爲人師學足以明

人性不徒誦其說而必欲施於事吾將見吾國子蔚然而有成宜有嘉褒以爲學者之寵可

太子中舍孫礪李國慶並可殿中丞制

勅其官孫礪等六經皆載治民之術而法者爲吏之資也汝等學之用以從政經之道廣矣擇其宜於民者法之文密矣取其平而不害者足以蒞爾官而成厥績焉膺茲敘遷勉用爾學可

秘書丞黃正殿中丞盧咸並可太常博士制  
勅其官黃正等自兵興以來調度日廣其能勤征摧以佐經費而均漕運使不滯以通諸用者皆方今之

急務其爲勞力宜有勸焉因茲歲成寵爾榮秩可

原州彭陽縣令郝嗣宗可某州推官制

勅具官郝嗣宗吏三歲而一易其法久矣然議者莫不以屢易爲患苟有能者吾豈奪焉爾於彭陽數有稱者就增其秩無易其居勉爾所爲以俟成績可

供備庫副使張禮一可西京左藏庫副使制

勅具官張禮一考課之法計過與功皆有常文得以敘進此所以待夫中材而勉其不及者也苟能有立吾必異之爾其往哉思所自效可

杜謩轉官制

勅某官杜諮吏部之格吏之升降遠邇勞逸之均皆有法焉不可以亂今銜以爾爲請吾旣重違大臣之言而顧有司之法苟不甚戾則吾豈不從無專爾私其率厥職可

柴宗慶第三女可封郡君制

勅某人相與將人臣之極也爾父常兼享其位而連戚里其於存歿宜有寵焉况其生也貴而歿也無嗣續之裔此吾尤所憫焉加爾郡封此非常典所以申吾不忘爾父之意可

洛苑使英州團練使內侍省內侍右班副都

知藍元用可眉州防禦使罷副都知制

勅具官藍元用爾之事予陳力茲久旣明而敏能濟以勤慎密一心不見過失屢更罷任實東予懷屢披奏章陳疾自請願解要職以思便安惟爾之舊予所嘉惟爾有勞予所錄雖可爾請豈無加褒服茲寵榮勅爾後效可

西頭供奉官閣門祗候綦恩可內殿承制制勅具官綦恩用兵久矣而將吏能以材武稱於軍中者豈不多哉苟有聞焉無不用也况如世衡吾所信其人其稱爾吾豈不然夫信以出令仁以

臨戰而嚴以一衆必皆出於智而後成功雖大將不  
過此也爾其勉之哉可

達州司戶參軍吳冲可奉寧軍節度推官制  
勅具官吳冲嚮者盜起州縣久而未捕議者皆曰素  
備不謹賞罰不明所以盜滋而吏怠今考爾所獲嘉  
爾之能第賞推恩予無所愛凡謹備者爾則勉之當  
使怠吏由爾而勸可

內殿崇班程逸可左監門衛將軍致仕制

勅具官程逸將軍之職居則宿衛天子出則征伐四  
方此武人之重也今假爾茲寵以爲歸老之榮者以

爾服勞既久能克厥終而不忘爾勤之意也其往欽  
哉可

懷州防禦判官倪俊可著作佐郎制

勅具官倪俊凡官人之法莫不期於得材而或失之  
於有遺或失之於太濫故有司之守厥有常文苟能  
應書皆可選擢可使中材之並進不濫而無遺此吾  
所以慎於擇材之意也爾膺茲舉其不勉哉可

大理寺丞宋緬孫周蘇逢等磨勘改官制

勅具官宋緬等庶官之守位者衆予欲百職並舉而  
人各趨之則於考功敘進之科厥有常法使夫自勉

者無不得焉蓋所以示勸而及衆也今考爾歲績法當遷秩爾無以爲例得其體予勸功進善之心以勉爾職其無懈可

盧守勤致仕制

勅具官盧守勤少也陳其力病而養其親非惟安生樂壽人之所欲而朝廷待勞能之臣厚始終之意考之典禮亦有彛章爾之事予旣勤且久今其病矣可以息焉尚有恩榮以爲爾寵夫勞而不報旣享爵祿之豐身孰與親宜專輔養之理可

曹元賓轉官制

勅具官曹元賓夫用兵之法不可先言則爲將之材亦難先見國家用兵久矣求之行陣堪將者少夫士有素蘊之材未得達者比降明詔廣其詢求而方平等以汝爲言吾將觀汝之能試汝以事俾升朝序徃自勉焉可

司理參軍杜彭壽可大理寺丞制

勅具官杜彭壽士有潔身以庶而服官以勤者長吏皆得薦論有司加之考閱用而進秩俾以臨民雖曰常科豈不慎選汝膺茲命其徃勉哉可

戶曹參軍尹植可某官致仕制

勅具官尹植惟爾陳力二十餘年以老而歸朕豈不  
憫升之朝序榮以宮僚徃其休哉安爾眉壽可

開封府開封縣主簿孫量可保大軍節度掌

書記制

勅具官孫量用兵之法不欲久惟能使調歛發輸不  
勞而民有餘力則可以制敵而有待於必勝西師之  
出久矣不惟將帥之選爲重其州縣臨民之吏能不  
乏民之力而佐吾之軍者亦難其人今爾旣薦者皆  
曰材而臨涇乃爾自請徃膺新命將試汝能可

內殿崇班韓守允可左監門衛將軍致仕制

勅具官韓守允自兵興于邊天下多事吏强有力者  
猶不能稱厥職而况於老者乎夫老者吾所優也豈  
宜强其力之所不逮徃從爾請以安爾私尚有茂恩  
以爲爾寵可

秦州興化縣主簿朱思道可衛尉寺丞制

勅具官朱思道夫庶爲吏之一節也今保薦之法惟  
以受財爲同坐則待夫能吏豈盡其材爾其奮厥所  
長思有所立不獨守夫一節而已焉可

溪洞楊先贊可權知古城州制

勅楊先贊世號竹勇雄于一州威能服其部人忠能

可  
奉其職貢官加寵秩以紹厥家往服恩章無忘報效

京西轉運按察使虞部員外郎杜杞可刑部  
員外郎旨集賢院充廣西轉運使制

勅具官杜杞自一隅用兵而調發輸役之繁無遠不  
及况廣東西之路於東南尤爲遠者而吏多不良吾  
之疲民既有賦歛之勞而今又罹盜賊之患吾一慮  
及爲之惻然凡與吾憂國者豈遑暇於安居哉汝爲  
吾徃其可憚勞吾又嘉汝名臣之後好學博文尚有  
榮名以爲汝寵凡吾寄汝之事繫汝之材吾惟責成

爾可自勉可

內殿承制孟均可千牛衛將軍制

勅具官孟均諸衛之置將軍唐之盛時兵官之重者也衛兵之制廢久矣其官雖存而世不知其重也自頃西北用師講求武事而議者多言唐之府兵可復朕方思之而爾能有請朕甚嘉焉爾其往哉吾將有用可

殿中丞史吉亨王珣瑜著作佐郎蘇黃中等  
磨勘改官制

勅具官史吉亨等夫官者所以盡人之材也至于材

之難得則姑以歲月常法積勞而敘遷誠亦冀有異  
材之善出於其間非止於此而已也爾等各膺例進  
宜自勉旃可

蘄州廣濟縣令充國子監直講邵必可大理

寺丞制

勅具官邵必夫學所以爲治也而儒者以記誦爲專  
多或不通於世務但能傳古之說而不足施之於事  
使愚者益固而不明而材者聽之而怠以爲儒迂不  
足學故教人之法必該於古今以博其識而成其業  
焉惟爾之學能明當世之事而屢形議論朕甚嘉焉

爾其守節礪行以率諸生而取古之有以宜于今者  
而養成之則功利廣矣可不勉哉可

外制拾遺

孫復可祕書省校書郎國子監直講制

朕勤治體喜賢俊冀慮四方遺逸之善有不吾聞者  
間屬近列屢騰薦章以爾孫復深經術荏德行躬耕  
田畝以給歲時東州士人皆師尊之吾命汝校文於  
書省講藝於胄序不由鄉舉不俟科選汝姑直屏雜  
說純道粹經使搢紳子弟聞仁義忠孝之樂此吾所  
以待汝意徃欽哉可

周陵荆湖轉運使制

勅具官周陵朕思欲寬民賦役而衣食給足天下之  
飢寒而患州縣之吏不能稱職其老疾閤懦而縱其  
下與夫貪暴而自爲殘者皆所以蠹於物而重困吾  
民者也然按察之司視而不舉反務較錙銖毫末之  
遺利而欲足用舒民豈不失其術而且勞者哉今荆  
湖之南十一州一監三十有一縣吏員不爲不多矣  
爾其察其不良者而舉其賢者使州縣得良吏未有  
民富而用不足者廣西之最知汝爲材今其往哉無  
替朕命可

皇弟安靜軍節度使允迪可責授右監門衛  
大將軍制

勅皇弟具官允迪五刑之屬三千其罪莫大於不孝  
小民無知犯者猶鮮况爾燕恭肅王之子而朕之諸  
弟也宜率訓義以迪四方而乃忘直麻哭泣之哀爲  
酣飲沈酗之佚肆情鄙行害于而家達於朕聽嗟惋  
無已朕苟貸法何以處王公之上而教天下哉宜歸  
爵秩下領屯衛盖寬於馭過而欲循省其非無蹈後  
悔也可

楊畋屯田使外郎且史館制

初前書省二十四司散郎皆當今要官况八直史館  
提太史筆蓋位之高者非材資甚美安可以兼此授  
以爾東染院使湖南鈐轄楊畋出自將家有文武器  
幹早由辭科歷任郡縣至提按之職嚮以群蠻繹騷  
湖嶺未靖故特命以使名徃專討輯逮茲三歲谿洞  
帖然而勤勞積時重瘧生疾瀝懇來上願還朝行予  
旣嘉爾作事不怠以集疹于厥躬又重煩爾以軍旅  
之役宜改出曹之號且以表年爲業苟能有以益於  
國家則執干戈書簡牘其義一也可

司勳郎中張從革可衛尉少卿制

勅洛宅朕之西都而居之未皇暇也然有司百職莫不具焉其留務之多閑在憲司之尤簡最爲清峻可  
以優賢具官某久服官勞頗彰吏最老于郎署分領西臺用乎考績之文俾列命卿之貴仕而至此是亦  
爲榮可

殿中丞府司錄李虞卿可國子博士制

勅具官某司錄爲府曹首民閑閱增減吏詞按曲直皆繫焉前涖此者或苛悍或懦軟率不免缺折之患惟爾慎不踰節庶不撓人吾用嘉之俾增秩于庠列爾士惟祗惟畏以茂對我朝家休命可

大明府推官徐治可著作佐郎制

勅某朝廷置磨勘之法必以考限用人者使詳試吏能而後進也則仕者由銓調改京秩乃榮階之始固非輕授以爾進士登第歷佐大幕所知論薦是用進擢爾惟自勉以副恩命可

平陽縣尉林銜可試祕校知永州祁陽縣事制

勅具官某南方之吏不能為吾以恩信撫茲谿蠻而使毒吾民於攻劫爾嘗被甲操矢而逐之則蠻之害民也深民之瘡痍者衆所宜自見焉今錄汝之勞命

汝以縣勉勤其政以撫吾人可

大理寺丞彭通程濬可殿中丞某人可贊善

制

勅具官某等仲尼有云言寡尤行寡悔祿在其中矣  
今有司大比群吏之治不待悉最課而後遷也但不  
處于尤悔斯遷矣某等或贊治遠藩或長人大邑奉  
法循職克無累疵銓考歲成用應陟典循省儲坊俾  
通朝守盍勤官業以對恩榮可

奏舉人杭州觀察推官呂邁可大理寺丞制

勅具官某夫士之處世如錐在囊中其鋒立見爾以

進人內藩府賓佐凡薦爾材者自戩等十有二人是  
必脫穎而出其輩者矣不然何言者之多也擢爾鄉  
屬試爾治民無謂寵利之可圖因違道以干譽其思  
行義以自立務求已而爲人服此訓辭則無疵吝可  
軍事推官王野民可大理寺丞制

勅具官王野民自兵興用乏而能不取民以佐有司  
之急者利入之法尤多非勤且敏者則莫能焉不惟  
于賞者趨之蓋亦適時之用也爾職酒利厥課屢聞  
所宜褒陞以勸怠者可

錄事參軍張師民可大理寺丞制

勅具官某方今官人之法由舉善而遷者必試之以  
臨民而觀其從政自兵興以來吾民可謂勞矣惟吏  
之良者能爲吾休息之今爾被舉曰材丞遷其秩將  
觀汝政其不勉哉可

閻文寶供備副使監亳州茶鹽稅制

勅具官某國家因山澤之饒興筦榷之利以足邦用  
實須幹臣爾其絕侵牟謹出入使歲課增羨而績効  
著明敘進之榮茲乃常典疇勞之賞尚有優恩可

滕公輔衛州推官制

勅具官滕公輔堂洎品之皆朕侍從之臣而外當寄

任之重文章來上薦爾爲材必有可觀以稱公舉宜  
從其請以察爾能往其勉哉無廢爾職可

藍田縣主簿權充府學教授 可華州蒲

城主簿就差管勾求與府學制

勅具官某古之教學之法肄習以時而難易先後教  
之有方非久而安之則不能以成其業今學者言爾  
講說訓導可以爲師吾欲觀汝之道至于有成故假  
爾大邑之佐使祿足以充然後安然克終其業可不  
勉哉可

歐陽文忠公全集卷一百二十八




115545







新嘉坡圖書館藏



Inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19 20

**TIFFEN** Color Control Patches

© The Tiffen Company, 2007

Blue	Cyan	Green	Yellow	Red	Magenta	White	3/Color	Black
------	------	-------	--------	-----	---------	-------	---------	-------

